

# Ekspresi Jiwa dan Munajat Doa Untuk Palestin di USIM esok

SEREMBAN 14 Ogos - Penderitaan dan kesengsaraan rakyat Palestin di Gaza ekoran tindakan rejim Zionis mendorong Universiti Sains Islam Malaysia (USIM) menganjurkan 'Malam Puisi Gaza: Ekspresi Jiwa dan Munajat Doa Untuk Palestin' bagi membangkitkan kesedaran mengenai nasib rakyat negara itu.

Majlis yang diadakan pada Sabtu ini bermula pukul 7 hingga 11.30 malam di pekarangan Dewan Besar USIM itu terbuka kepada orang ramai yang turut terkesan terhadap kekejaman tentera Israel di Palestin.

Pengarah Pusat Kebudayaan USIM, Ismail Ahmed berkata, program tersebut diadakan buat julung kali bagi memberi peluang kepada USIM, entiti terlibat serta masyarakat di negara ini untuk bersama-sama merasai keperitan dan kesengsaraan warga Palestin.

"Antara objektif program tersebut adalah bersama-sama melestarikan sifat keprihatinan dalam isu kemanusiaan sejagat, mencari

dana dan membantu Tabung Aman Palestin bagi meringankan kesengsaraan rakyat Palestin melalui medium seni sastera dan budaya.

"Malam Puisi Gaza: Ekspresi Jiwa dan Munajat Doa Untuk Palestin menggunakan medium seperti persembahan deklamasi puisi dan dengarkan lagu-lau puisi oleh artis dan para penyajak terkenal tanah air," katanya di sini hari ini.

Penganjuran majlis berkenaan turut mendapat kerjasama Dewan Bahasa dan Pustaka (DBP), Institut Terjemahan dan Buku Malaysia (ITBM), Persatuan Penulis Nasional (Pena), Akademi Seni Budaya dan Warisan Kebangsaan (Aswara), Gabungan Penulis Nasional (Gapena) serta Aman Palestin.

Menariknya pada malam itu adalah persembahan yang menggabungkan kalangan penggiat sastera dan budaya, aktivis terkenal tempatan dan karyawan seni negara.

Antara mereka yang akan menyampaikan puisi pada malam itu

ialah penyajak terkenal tanah air seperti Khaled Salleh, Ahmad Shukri Abdullah, Haryani Haron dan Shamsudin Othman.

Penyajak jemputan yang turut mendeklamasikan puisi pada malam tersebut ialah Timbalan Naib Canselor (Akademik dan Antarabangsa) USIM, Prof. Datuk Dr. Musa Ahmad; Ketua Pengarah DBP, Datuk Dr. Awang Sariyan dan Pengarah Urusan ITBM, Mohd. Khair Ngadiron.

Turut hadir menyanyikan lagu-lagu puisi ialah penyanyi Koprata, Siso, Nash, Fauzi Marzuki selain kumpulan lagu puisi USIM, Kar-yaperang.

Tambah Ismail, orang ramai boleh hadir sama pada malam itu selain menyumbang dana dengan cara menonton persembahan klip-klip video Malam Puisi Gaza: Ekspresi Jiwa dan Munajat Doa Untuk Palestin yang akan dimuat naik di laman sosial Facebook dan laman perkongsian video YouTube.



ISMAIL Ahmed (dua dari kiri) bersama Presiden Majlis Persatuan Pentadbir Institusi Pengajian Tinggi Awam Malaysia, Mohd. Salehudin Sukor (tengah) serta Solidariti USIM mengecam Israel melalui penganjuran Malam Puisi Gaza selepas mengadakan sidang media di USIM, Seremban, semalam. - UTUSAN/FARABI SHEIKH SAID AL JABR